

Uunga siunnersuut: Naalackersuinikkut sulinermut aningaasatigut tapiissuteqartarneq pillugu Inatsisartut inatsisaata allanngortinneqarneranik Inatsisartut inatsisissaattut siunnersuut.

(Suleriaaseq pillugu Ataatsimiititaliaq)

Saqqummiussissut

(Inatsisartut Siulittaasuat)

Siullermeerneqarnera

Naalackersuinikkut sulinermut aningaasatigut tapiissuteqartarneq pillugu Inatsisartut inatsisaata allanngortinneqarneranik Inatsisartut inatsisissaattut siunnersuut Inatsisartut Siulittaasoqarfiat sinnerlugu matumuuna saqqummiuppara.

Namminersorlutik Oqartussat tapiissutit aqutigalugit naalackersuinikkut suliniaqatigiiffinnut aningaasalersuisarnerannut maleruagassat atuuttut inatsisissatut siunnersuutikkut erseqqissaavigineqarput.

Tapiissuteqartarnermut inatsit atuuttoq 2001-imi akuersissutigineqarpoq, tamatumalu kingorna 2003-mi 2005-imi kiisalu 2006-imi allanngortinneqarluni. Inatsisip kingullermik allanngortinneqarneratigut partiit tamarmik aningaasanik tunngaviusunik ukiumut 300.000 kr.-inik tapiiffigineqartarput, taakkulu saniatigut ilaasortanut ataasiakkaanut naatsorsuullugu 125.000 kr.-it tunniunneqartarlutik.

Tamatumalu saniatigut partiinut toqqaannanngikkaluamik tapiissutit ilaatigut Inatsisartut allaffeqarfiata missingersuutai aqutigalugit partiinut siunnersortit aningaasarsiaqartinneqarnerisigut annertuumik annertusaavigineqarsimapput. Toqqaannanngikkaluamik tapiissutit ullumikkut ima annertussuseqarlutillu pissuseqarput tapiissuteqartarnermik inatsimmut naapertuuttuunerat nalorninarluni tamatumalu peqatigisaanik naalackersuineramik suliniaqatigiiffinnut pisortanit tapiissutigineqartartut tamakkiisut pillugit tamat paasisaqarsinnaanerannut akimmisaartitsillutik.

Ilaatigut naalackersuinikkut suliniaqatigiiffinnut pisortat tapiissutaannut inatsisitigut killiliussanik aalajangersimasunik pilersitseqqinnissaq ilaatigullu tapiissutit tamat oqartussaaqataaneranni inatsisitigut akuerisaasumik tunniunneqassappata pisariaqartumik pisortat tapiissutaasa ersarissunngorteqqinnissaat inatsisissatut siunnersuutikkut matumuunakkut siunertarineqarpoq.

Toqqaannangikkaluamik tapiissutit Namminersorlutik Oqartussanit tapiissutigineqarsinnaatitaasut allattoqqissaarneqarnerisigut inatsisitigut inissisimaneq erseqqissoq inatsisip allangortinneqarneratigut pilersinneqarpoq. Tamatuma kingorna inatsisitigut tungavissinneqarsimanngitsunik toqqaannartumik toqqaannangitsumillu tapiissuteqartoqarsinnaajunnaassaaq. Taamaalilluni aningaasat partiinut naalackersuineramik suliaqartunut Inatsisartullu allaffeqarfiannut Nunatta Karsianit atugassiissutigineqartut siunissami ersarilluinnartumik nassuiarluagaasumillu immikkoortinneqarluinnarput.

Taama allanguineq Inatsisartut allaffeqarfiata partiillu soqutigisaanut naapertuuttut nalilerneqarpoq. Allaffeqarfiup missingersuutaanik Inatsisartut allaffeqarfiata aqutsisinaanera nakkutilliisinaaneralu siunissami pisariinnerulissaaq. Illuatungaatigullu akiliuteqarnatik sullississutinik atortunillu sorlernik atuisinaanertik pillugu partiit ersarissunik malittarisassaqaalissapput, soorluttaaq partiit aningaasaqarnikkut aqqissuussisinaanikkullu kiffaanngissuseqarnerat siunnersuutikkut isiginiarneqartoq.

Siunnersuutip nassatarisaanik aningaasartuutaanerussutissanut taarsiutissanik partiinut tapiissutit qaffanneqarnissaannik inatsisissatut siunnersuut ilaqartinneqarpoq. Inatsisartut Allattoqarfiannut aningaasaliissutit ikilisinnerisigut qaffaaneq aningaasalersorneqassasoq naatsorsuutigineqarpoq, taamaalillunilu siunnersuut ataatsimut isigalugu missingersuutininut sunniuteqassanani. Siunnersuut akuersissutigineqarpat tassunga naapertuuttumik 2010-mut aningaasanut inatsisissatut siunnersuummut allanguutissatut siunnersuummik saqqummiussisoqassaaq.

Inatsimmut nassuiaatit itisiliissutaasut innersuussutigalugit siunnersuut Inatsisartunut suliaannangortippara.